

# hiru gizon bakarrea

HERRI bat bizi dut,  
herri zahar jatorra,  
herriaren gerri  
eta haren suztarra;  
inoiz ez du kendu  
laneko atorra,  
inoiz ez du lortu  
nahi lukeen apurra;  
bizitzen da ta hiltzen  
ta maite du lurra  
eta itotzen dute  
ta agertzen du lorra  
ta ari duen diharra  
ez dihoa inora.

---

LURRA hartu dut esku barruan,  
eskutada lurra,  
herriko neure lurra,  
neure asaben lurra,  
lurreko neure lurraren  
lur puska zihurra.

Harriaren arreba  
lurra hartu dut esku barruan,  
euskaldunen ama lur,  
uraren kideko lur,  
suaren sostengu lur  
zuraren orpoko lurra.

Lur hotza, lur beroa;  
lur hila, lur bizia;  
lur nabar, lur argia;  
lur astun, lur arina;  
lur samin, lur atsegin;  
lur gogor, lur gozatsu;  
lur iraindu, lur maite;  
lur jator samurra.

Lurra hartu dut eskuan  
mun emateko,  
besarkatzeko,  
bularrean herstutzeko  
luzaro.  
Eta gero,

neure burua baino  
gorago jaso eskua,  
burutik behera utzi dut  
sorbaldaz behera jausten,  
neure lur guztiz behera,  
lurrezko bataioaren  
seinaletan.